

Urralburu eta Aragonen
kontrako epaiketa

Aragonek eta Urralbururen emazteak ez zituzten ordaindu Rotako txaletak

Ordainketak itxurazkoak izan zirela aitortu du aurreneko aldiz lekuko batek

Antonio Aragonen eta Gabriel Urralbururen emaztearen Rotako (Cadiz) txaletak ez zituzten beraiek ordaindu. Luis Carrasco lekukoak atzoko saioan esan zuenez, txaletak Jorge Esparzak ordaindu zituen —ustez diru komisioekin—, eta Aragonek eta Urralbururen emazteak itxurazko ordainketak baino ez zituzten egin.

Ana Unanue / Iruñea

LUIS CARRASCO lekukoaren deklarazioa harrigarria eta zenbait unetan barregarria ere izan zen, nahiz eta defentsako abokatuak ez zien inolako graziairik egin. Akusatuen merkataritza elkartearen kontabilitate ardura duna izandakoak hasieratik onartu zuen duela bi urte, instrukziozko epailearen aurrean deklaratu zuenean, gezurra esan zuela. Orduan akusatuen alde deklaratu zuen, «uste nuelako horrela arazo gutxiago edukiko nituela». Atzoko saioan atzera egin eta zuzendu egin zituen 1996ko otsailean esandakoak.

Hala, aitortu egin zuen Aragonek eta Urralbururen emazteak Rotan erosi zituzten txaletak beste norbaitek ordaindu zituela. Herrilanetako sailburu ohiak, Olivia Baldak eta Luis Roldanek bina txalet erosi zituzten 1991n Cadizen. Akusazioen arabera, lehen ordainketa Obrascon eta Lain enpresen txeeekin egin zen, eta bigarrena esku dirutan —Esparzak 68 milioi pezeta eman zizkien zaku batean Promociones Roteñaseko arduradunei—.

Carrascok berretsi egin zuen akusazioen hipotesia. Lekukoak esan zuenez, diru komisioan afera prentsan agertu zenean (1994ko udaberrian) Aragonek eta Urralbururen emazteak 14na milioi pezeta ordaindu zituzten,



Gabriel Urralburu eta haren emaztea, Olivia Balda, Auzitegira iristen.

JESUS DIGES / EFE

baina ordainketak itxurazkoak izan ziren, astebete geroago itzuli egin baitzieten dirua. Lekukoaren arabera, akusatuei mehatxu egin zieten, itxurazko ordainketak egiten ez bazituzten auzitara eramango zituztela esanez —ordurako Madrilgo epaile bat Roldanen afera ikertzen ari zen, eta Urralburu eta Aragon ere susmoan zeuden—.

Aragonek epaimahaiaren aurrean deklaratu zuenean ez zuen argitu zer gertatu zen itzuli zizkioten 14 milioiekin. Horregatik, Carrascok argi utzi nahi izan zuen ez zituela berak hartu. Lekukoaren arabera, Aragonek hartu zituen, eta bankuz banku ibili zen diru hori partitzen. «Kontzientzia zuen zamar arintzearen, gobernu kanpoko hainbat erakunderi eman zien dirua. Erakunde bati 3,2 milioi, beste bati milioi bat...», azaldu zuen.

Hori entzutean, lekukoa eta

Aragon aurrez aurre jartzeko eskatu zuen fiskalak. Aurrez aurrekoan, Aragonek Carrascok esandako zenbait gauza zehaztu zituen. Aragonek esan zuenez, 14 milioietatik 12 inguru zorrak kitatzeko erabili zituen, eta beste biak onegintzako pare bat erakunderi «oparitu» zizkien. Carrasco eta Olivia Balda ere aurrez aurre jartzeko agindu zuen fiskalak, baina Urralbururen emazteak uko egin zion azalpenak emateari. Hala eta guztiz, Carrascok garbi utzi zuen Baldak ez zuela sosik ordaindu Rotako txaleten truke.

Sancristobal eta Roldanen dibortzioa

Julian Sancristobal, Estatuko Seguratasunerako zuzendari izandakoak, GAL auziko akusatuen aulkia utzi zuen atzo Iruñeko epaiketan lekuko gisa deklaratzeko.

Akusazioek 1989-90 urteetan

Roldani emandako txeki batzuei buruz galdetu zioten Sancristobali. Lekukoak orain arteko bertsioari eutsi zion: esan zuen Roldan adiskide zuela, eta dirua eskatu ziola garai hartan emaztearengandik bereiztekoan zegoelako. «Dibortzioa ordaintzeko behar zuela esan zidan, eta nik 60-65 milioi inguru utzi nizkion, mailegu gisa». Roldanek sasoi hartan ehundaka milioi zituela gogoratu ziotenean, berak ez zekiela erantzun zuen Sancristobalek. Ukatu egin zuen Roldanekin bestelako diru kontuak eduki zituela eta eraikuntza enpresen eskupekoak jaso zituela.

Sancristobalen agerraldia zela-eta, segurtasun neurri zorrotzak hartu zituen Poliziak. HBko eta Jarraiko 40 bat kidek «Estatu terrorismoaren, PSOE-ren eta ustelkeriaren arteko lotura» salatzeako kontzentrazioa egin zuten Auzitegiaren atarian.

Aragon eta Medicus Mundi

Carrascok esan zuenez, Aragon lur jota zegoen 1994ko udaberrian. «Zama handia zuen kontzientzia, eta ez zuen ezertarako animorik. Gure bulegora negarrez, lur jota eta etsita, etorri zen. Zerbaiten beldur zela zirudien, eta esan zidan bulegoan gordeta genituen 14 milioiak gobernu kanpoko edozein erakunderi emateko», azaldu zuen lekukoak. Fiskalak dirua zer erakunderi eman zioten galdetu ziotenean, ez zuela gogoratzen erantzun zuen: «Ez dakit. Medicus Mundi, Medicos Sin Fronteras, Caritas... Era horretako erakundeei. Ordainketa batzuk neuk egin nituen, Aragon urduriegi zegoelako, baina ez dut gogoratzen zehazki nor sartu genion dirua».

Lekukoa, «lotsagabe hutsa»

Javier Muñoz fiskala eta Andres Percas abokatuak kexu agertu ziren Carrascoren jarrera «lotsagabeagatik», eta epaimahaiak behar bezala portatzeko eskatu zion lekukoari. Fiskalak galdetu zion Carrascori Aragonen 14 milioiak zapata kaxa batean eman ote zizkioten, eta lekukoak erantzun zion ez zuela gogoratzen. «Nola ez duzula gogoratzen? Zenbat aldiz eman dizkizute 14 milioi zapata kaxa batean?», galdetu zion fiskalak, haserre. «Zuri bezainbestetan», ihardetsi zion Carrascok. «Jauna, lekuko hau lotsagabe hutsa da», esan zion orduan fiskalak epaimahaiako lehendakariari.

Urralburu eta Suitzako abokatuak

Carrascoren aurretik Jaime Garcia Rosado Madrilgo notarioak deklaratu zuen epaimahaiaren aurrean. Garcia Rosadok akusatu guztiak ezagutzen zituen, bere zerbitzuak erabiltzen baitzituzten behar zituzten agiriak egiteko. Notarioak esan zuenez, Urralburu eta haren emaztea elkarrekin joaten ziren Madrilgo bulegora Residencial Menorquina-ren gestioak egitera. Era berean, baieztatu egin zuen Urralburuk Suitzako abokatu batzuei bere kontu korronteen arrastoa ezkutatze ahalmena eman zela 1995eko maiatzean. Nafarroako Gobernuak lehendakari ohiak ez ditu sekula onartu Madrilgo notarioak aipatu datu horiek.

Itxurazko enpresak eskupekoak ezkutatze

FOX, Gextex eta Banto enpresak «itxurazkoak» ziren, eta faktura faltsuak egiten zituzten Huarterek akusatuei ordaintzen omen zizkien eskupekoak ezkutatze. Hala deklaratu zuten arratsaldeko saioan bi polizia judizialek. Aipatu poliziek bi urte eman zituzten enpresa horien diru mugimenduak ikertzen, eta gauza arraro ugari atzeman zituzten: enpresek ez zuten ez egoitzarik, ez langilerik, ez jar-

duerarik, baina, hala eta guztiz, urtean milaka milioi pezeta fakturazten zituzten. «Harterek justifikatu gabeko diru irteerak zituzten, enpresa hauek faktura faltsuak egiten zituzten ordainketak justifikatzeko», esan zuten.

Fox eta Gextexeko buru izandakoak, berriz, gezurtatu egin zuen faktura faltsuak egiten zituztela. «Ez da egia. Huarterentzat obrak bilatzen genituen. Telefonoz pasatzen genien

informazioa, eta, obra egitea lortzen bazuten, ordaindu egiten zizkiguten zerbitzuak», adierazi zuen Pedro Galicia Puente. Lekukoak ez zituen akusazioak konbentzitu, argitu gabeko puntu ilun asko utzi baitzituen. Esan zuenez, berak ez zuen sekula txostenik egin Huarterentzat, ez zekien zenbat kobratzen zuten, ezta non zuten egoitza ere.

Galicia Puente Madrilgo emakume baten izene-

an jarri zituen enpresak. Emakume horrek epaimahaiari esan zionez, engainatu egin zuten: «Esan zidaten turismo enpresak zirela, eta lana emango zigutela, neuri eta nire bi alabei, eta nik sinetsi egin nuen. Inozoa izan nintzen, eta eman zizkidaten agiri guztiak sinatu nituen, baina ez zidaten berriro deitu. Ez dakizue zer nolako kaltea egin didan auzi honek. Izugarri sofritu dut, etekinik atera gabe».

Bantoko administratzaileak, Fernando Martin Galvek, esan zuen bezero batek hala eskatu ziolako sartu zela enpresa horretan. «Baina sekula ez nuen ezer egin Bantorentzat. Uste dut enpresak ez zuela ezer egiten. Nik behintzat inoiz ez nuen kontabilitate libururik ikusi. Geroago jakin nuen, prentsan irakurtzean, fakturak egiten zituztela», deklaratu zuen epaimahaiaren aurrean. X